

Lavachau per la dretgira da Landquart

Il tribunal federal admonescha da betg targlinar

DA CLAUDIA CADRUVI / ANR

■ Dapi prest ventg onns sa chattinan quatter proprietaris da suloms pervi da dretgs da passadi ed occupeschan las dretgiras cun la charplina. Era il tribunal federal ha gia relaschè passa in tozzel decisius. En sia ultima sentenza admonescha Losanna la dretgira da Landquart da betg far palandrims.

Sper dretgs fundamentals cuntegna la constituziun era dretgs da procedura. Uschia ha mintga persona che va avant dretgira il dretg che sia chausa vegnia tractada entaifer in temp commensurà. Sche quai na capita betg, po ina persona pertutgada recurrer tar in'istanza superiura. Gist quai han fatg ils proprietaris dal sulom ch'è engrevgià cun il dretg da passadi. Dapi trais onns spetgan els sin ina decisium procedurala da la dretgira da Landquart.

Dretgira chantunala refusa il recurs

Il 2014 avevan ils proprietaris pretendì da la dretgira ch'i saja da determinar ils cunfins tar las trais parcelas vischinas surbajegiadas. Da las chasas anora cuntanschan ins la via mo entras il dretg da passadi, pia sur la via privata che maina sur la parcella dals recurrents.

La dretgira da Landquart ha fatg intginas examinaziuns davart las premissas da la procedura e n'interprendì nagut pli dapli il schaner 2015. Dapi lura saja la sentenza pendenta, criticgescha il tribunal federal. L'onn passà han ils proprietaris pretendì da la dretgira chantunala ch'ella admoneschia la dretgira da Landquart da finalmain far vinavant.



Il Tribunal federal ha decidì ed admonì.

Lentschatta da quest onn ha la dre-tgira chantunala dentant refusà l'uschenumnada «Rechtsverzögerungsbeschwerde» u per rumantsch il recurs da retardada da dretg. La dretgira chantunala ha dentant concedì che la procedura duria propi ditg ed ha perquai renunzià da pretender custs da dretgira dals recurrents. Sinaquai han lezs tratg enavant la chausa a Losanna.

Trais onns fatg nagut

Il tribunal federal ha uss dà raschun ad els e pretenda da la dretgira da Landquart dad immediat cuntinuar e da decider schebain las premissas per la procedura sajan insumma dadas.

La dretgira chantunala aveva anc crittigà ch'ils recurrents sajan involvids dapi il 2003 en passa 106 cas giudizialas. Cun lur sa cuntegnair hajan ils recur-

rents procurà per in tschuat lavur a la dretgira regiunala e s'empossian perquai sez che la decisium s'entardia. En vista a tut quai che saja gia currì e passà ha la dretgira chantunala gi chapientscha che la dretgira da Landquart ha tschentà autras prioritads.

Il tribunal federal ha dentant in auter puntg da vista. Quant ditg ch'ina procedura dastgia cuzzar saja da giuditgar te-

nor l'impurtanza d'in cas per ils pertutgads, tenor la cumplexitad, tenor il sa cuntegnair dals pertutgads e tenor l'agir da la dretgira. Ad ina dretgira sappian ins rinfatschar in retardament sch'ella restia ditg inactiva senza ina raschun visibla. Trais onns saja la dretgira da Landquart stada inactiva. Per prender ina emprima decisium procedurala saja quai simplamain memia ditg, scriva il tribunal federal.

Terminar conflict cronic

Plinavant na possian ins betg dir che quest cas haja ina pli pitschna impurtanza perquai ch'ils pertutgads sajan gia stads involvids ils ultims 15 onns en numerus auters cas pervi da questa charplina da cunfins. Ina «cronificaziun dal conflict» pledia anzi per ina decisium svelta che termineschia la chausa almain sin nivel giuridic. Il dumber da tut las proceduras en las qualas ils recurrents sajan involvids na saja anc nagin mussament ch'ils recurrents s'empossian sez che la procedura duria pli ditg, punctuescha il tribunal federal.

Cun betg prender la decisium procedurala, che saja madira gia dapi passa trais onns, violeschia la dretgira da Landquart tant la constituziun sco era la convenziun europeica dals dretgs umans, constatescha il tribunal federal. Era la sentenza da la dretgira chantunala stettia en cuntradizium a la constituziun.

Sentenzia 5A_207/2018 dals 26 da zercladur, publicada ils 19 da fanadur 2018

MAD